
ԴՐՎԱԳՆԵՐ ՊԱՀԼԱՎՈՒՆԻ ՏՈՀՄԻ XIII-XVII ԴԱՐԵՐԻ ՊԱՏՄՈՒԹՅԱՆ

ՎՐԵՃ ՎԱՐԴԱՆՅԱՆ

Հայոց Բագրատունյաց թագավորության անկումից հետո Պահլավունիները շարունակեցին ռազմաքաղաքական ու եկեղեցանպաստ գործունեությունը Շիրակում, ի մասնավորի՝ քաղաքամայր Անիում: XIII դարից նրանք վասալական կախման մեջ էին Ջաքարյաններից և նրանց հովանու ներքո ծավալում էին ազգաշահ գործողություններ: 1225 թ. Անիի արքեպիսկոպոս է հիշվում Գրիգոր Պահլավունին, որի եղբայր Ղարիբը զինվորական էր: Նրանք 1225 թ. նորոգում են Մարմաշենի վանքը, կալվածքներ ընծայաբերում նրան¹: Սակայն նույն թվականին Գառնիի մատույցներում Իվանե Ջաքարյանի գլխավորած հայ-վրացական զորքերի՝ Խորեզմի շահի դեմ մղած ճակատամարտում Ղարիբ Պահլավունին զոհվում է²:

Ջաքարյանների օրոք Պահլավունիների ժառանգները շարունակում են կրել այդ տոհմում սովորական դարձած «մագիստրոս» պատվատիտղոսը³: Նրանք գլխավորում են նաև Շիրակի հոգևոր իշխանությունը: Գրիգոր Պահլավունուց հետո Անիի արքեպիսկոպոսի պաշտոնը վարում է նրա որդի Մարգիսը⁴: Վերջինս Բագնայրի վանքի 1262 թվակիր արձանագրության մեջ հիշվում է որպես «Անի մայրաքաղաքի վերադիտող» (տեսուչ, հայրապետ), նաև «տեսառն տեղոյս»⁵: Մարգսի եղբորորդի Հովհաննեսը հիշվում է որպես Շիրակ գավառի «հայրապետ», «իշխեցող տեղոյս»⁶:

Ջաքարե ամիրսպասալարի մահից (1212 թ.) հետո նրա որդի Շահնշահ I-ը Վրաստանի Թամար թագուհու կողմից ճանաչվեց Ջաքարյան հայկական իշխանապետության տիրակալ⁷: XIV դարում Պահլավունիների շառավիղները շարունակում էին հավատարմորեն ծառայել Ջաքարյան իշխանապետին: Շահնշահ II ամիրսպասալարի օրոք՝ XIV դարի սկզբներին, Ջաքարյան տան հեջուբի ազդեցիկ պաշտոնը վարում էր Ջաքարիա Պահլավունին: Մի ձեռագիր հիշատակարանում (1313 թ.) նա հիշվում է

¹ И. О р б е л и. Избранные труды. Ереван, 1963, с. 443.

² Նույն տեղում:

³ Նույն տեղում, Դ. Ա լ ի շ ա ն. Շիրակ. Վենետիկ, 1881, էջ 119, Գ. Յ ո վ տ և փ ե ա ն. Յիշատակարանք ձեռագրաց. Ա, Անթիլիաս, 1951, էջ 888, Դիվան հայ վիմագրության. պրակ I, կազմեց Հ. Օրբելի, Երևան, 1966, էջ 17 և այլն:

⁴ Դիվան հայ վիմագրության, պրակ I, էջ 61:

⁵ K. B a s m a d j i a n. Les inscriptions arméniennes d'Ani, de Bagnair et de Marmachen. Paris, 1931, p. 368-369 (№ 180).

⁶ Գ. Յ ո վ տ և փ ե ա ն. Յիշատակարանք ձեռագրաց. Ա, էջ 891:

⁷ Հաւաքումն Պատմութեան Վարդանայ Վարդապետի. Վենետիկ, 1862, էջ 140, 153:

որպես «հեջուր և առաջնորդ տանս մեծի աթապակ ամիրսպասալար Շահնշահի», և բնորոշվում իբրև «քաջ և ընտիր պատերազմող»⁸:

Պահլավունիները XIV դարում Ջաքարյանների հովանավորության տակ վարելով պետական, զինվորական և եկեղեցական բարձր պաշտոններ՝ նույնպես ծառայել են Հայրենի երկրի փառքի գորացմանը: Ջաքարիա Պահլավունուն տրված «քաջ և ընտիր պատերազմող» բնութագիրը խոսում է վկայություն է այն իրողության, որ նա օժտված է եղել նաև զինվորական գործառնությամբ՝ անշուշտ, պատերազմական իրավիճակում, իսկ խաղաղ պայմաններում կատարել է հեջուրի պարտականությունները: Հավանաբար, նա եղել է Շահնշահ II-ի խորհրդականը նաև զինվորական գծով: Հեջուրը Ջաքարյան իշխանապետության գերագույն գործակալության տնօրինողն էր, որի իրավասությանը ենթակա էին նաև Ջաքարյան իշխող տան ելևմտական գործերը⁹:

XIV–XVII դարերում Պահլավունիները նախկինի պես տիրում էին նաև Հավուց Թառի Ամենափրկիչ վանքին և նրա հողատիրություններին: Միմեռն Երևանցի կաթողիկոսը վկայում է, որ Գրիգոր Մագիստրոս Պահլավունու (Բջնեցու) սերունդները հաջորդաբար իշխել են այդ վանքում գրեթե մինչև իր ժամանակները: Նրանք վանքը դարձրել են «գհայրենի մուլք» և «որդիք և թոռունք և յետագայ ազգատոհմք սորին (Գրիգոր Մագիստրոսի ընդգծումը մերն է.– Վ. Վ.), մի գկնի միոյ յաջորդեցին զառաջնորդութիւնն սորին ոչ միայն ի յիշխանութիւնն Հայոց, այլ և ի ժամանակս թագաւորացն պարսից մինչև գրեթէ ի ժամանակս մեր»¹⁰:

XV դարի առաջին կեսին Հայաստանի եկեղեցական կյանքում ազդեցիկ դեր էր խաղում արքեպիսկոպոս Ջաքարիա Հավուցթառեցի Պահլավունին¹¹, որը էապես սատարեց Հայոց կաթողիկոսական գահաթոռը Կիլիկիայից (Սսից) իր նախնական վայր՝ Էջմիածին տեղափոխելու գործընթացներին: Հայտնի իրողություն է, որ Կիլիկիայում Հայոց թագավորության բարձումից (1375 թ.) հետո Սսի Աթոռը կորցրեց ոչ միայն պետական հովանավորությունը, այլև իր երբեմնի ազդեցությունն ու հմայքը, «գի ապականեցաւ կարգ եւ կանոնք սուրբ հարցն մերոց ի կիլիկեցոց առաջնորդացն»,– վկայում է Թովմա Մեծոփեցին¹²: «Նուիրակք եւ խրատատուք եւ եպիսկոպոսք նոցին գայթակղութեամբ զբազումս ի հաւատոցն Քրիստոսի ի բաց հանին եւ անհաւասար արարին»,– հավելում է մատենագիրը՝ նշելով նաև այլ կարգի օրինագանցություններ, որ տեղ էին գտել Սսի Աթոռում¹³: Թովմա Մեծոփեցին Կաթողիկոսական Աթոռը Էջմիածին տեղափոխելու գործի ջատագովն ու կազմակերպիչներից մեկն էր, ուստի հասկանալի են դառնում նրա որակումները:

1439 թվականից սկսած՝ Վայոց ձորի Հերմոնի վանքի սան և Գրիգոր Տաթևացու փառասուն աշակերտ Հովհաննես վարդապետի հետ միասին Թովմա Մեծոփեցին ե-

⁸ Գ. Յ ո վ ա ե փ ե ա ն ց. Խաղբակեանք կամ Պոռշեանք Հայոց պատմութեան մէջ. Անթիլիաս, 1969, էջ 8:

⁹ Հ. Մ ա ն ա ն դ յ ա ն. Երկեր. Գ, Երևան, 1977, էջ 182:

¹⁰ Ջամբո, շարագրեցեալ ի Միմեռնէ կաթողիկոսէ Երևանցոյ. Վաղարշապատ, 1873, էջ 276:

¹¹ Նույն տեղում, էջ 277:

¹² Թ ո վ մ ա Մ ե ծ ո փ ե ց ի. Պատմագրություն, աշխ. Լ. Ս. Խաչիկյանի. Երևան, 1999, էջ 224:

¹³ Նույն տեղում, էջ 225–229:

ռանդուն գործունեություն է ծավալում Կաթողիկոսական Աթոռը Սսից Էջմիածին տեղափոխելու համար: Նրանց սատար են կանգնում նաև Արտազի Գրիգոր եպիսկոպոսը, ինչպես նաև Չաքարիա Հավուցթառեցի Պահլավունի արքեպիսկոպոսը, Բջնիի եպիսկոպոս Հովհաննեսը: Նրանց ջանքերով և Կարա-կոյունլու թուրքմենների փառիշտի Ջհանշահի, Երևանի կառավարիչ Յաղուբի օժանդակությամբ 1441թ. Վաղարշապատում գումարվում է համազգային ժողով, որին մասնակցում էին նաև հայ ազատներ, տանուտերեր: Ժողովականների մեջ հիշվում են նաև «տեր Չաքարեն Հաուուց Թառայ ի յազատորդեաց» և Պահլավունիների հինավուրց ոստան Բջնիից վերոհիշյալ Հովհաննես եպիսկոպոսը¹⁴:

Կաթողիկոսական Աթոռի փոխադրումը վառ ապացույց էր այն իրողության, որ Էջմիածինը դարձել էր համազգային մտավոր-մշակութային և հոգևոր-եկեղեցական կենտրոն, որն ի գործու էր համախմբել ժողովրդին և դառնալ նրա գոյատևման հուսալի երաշխիքը: Էջմիածինը նաև քաղաքական հույսեր էր ծնում հայ ազատանու, ժողովրդական լայն խավերի մեջ: «Լրումն էհաս ժամանակի փրկութեան Թորգոմեան ազգիս», – գրում է ժամանակակից պատմագիրը¹⁵:

Պահլավունիների շառավիղները լիովին հաղորդակից էին երկրում իշխող տրամադրությանը և գործուն աջակցություն էին ցուցաբերում Էջմիածնի Մայր Աթոռի վերականգնման և ամրակայման գործընթացներին: Անշուշտ, նաև նրանց աջակցությամբ էր, որ «զաջ Լուսաւորչին ի Սոյ գողացեալ բերին յԷջմիածին, և վերստին հաստատեցին զկաթողիկոսութիւն»¹⁶, վկայում է Սամուել Անեցու շարունակողը: Կիրակոս Խորվիրապետու կաթողիկոս ձեռնադրողներից էր նաև Չաքարիա Հավուցթառեցի Պահլավունին¹⁷:

Սակայն հաջորդ տարվա ընթացքում Հայոց նորընծա հայրապետի շուրջ ծավալվում է հակակրանքի բուռն հորձանք: Հոգևոր դասի որոշ պարագլուխներ դավ են նյութում նրա դեմ՝ գահընկեց անելու, հոգևոր բարձրագույն իշխանության ուղենիշներն իրենց կամեցած ձևով փոխելու մտադրությամբ: Կաթողիկոսի գահի հնարավոր հավակնորդներ էին դիտվում Հովհաննես Հերմոնեցին, Արտազի Գրիգոր եպիսկոպոսը և Չաքարիա Հավուցթառեցի Պահլավունին: Վերջինս արդեն ծերացել, տկարացել էր, և թվում է, թե առանձին եռանդ չպետք է դրսևորեր այդ ուղղությամբ: Սակայն Հայոց կաթողիկոսի դեմ ծառայողները Չաքարիային հղած թղթում նրան մեղադրում են Կիրակոս Խորվիրապետուն կաթողիկոս ձեռնադրելու համար: Արձագանքելով բանասարկուներին, Չաքարիան «ընդունակ եղև չարին» և նրանց հետ մեկնեց Հովհաննես Հերմոնեցու մոտ, որը «նոյն ժամայն ժողովեաց զբազում անուղղայ եպիսկոպոսք եւ քահանայք», որից հետո նրանք մտան Էջմիածնի Մայր տաճար՝ «բարկութեամբ եւ սրտմտութեամբ լցեալ»: Կիրակոս կաթողիկոսը երկնչում և «փախուստ առեալ, մտան է ի տուն քրիստոնէի միոջ գաղտագողի»: Բայց դավ նյութողները գտան նրան և բռնությամբ տարան Երևանի կառավարչի՝ Յաղուբ բեկի մոտ, նրա առջև Կիրակոսին

¹⁴ Նույն տեղում, էջ 219–220:

¹⁵ Նույն տեղում, էջ 230:

¹⁶ Սամուելի քահանայի Անեցոյ Հաւաքմունք ի գրոց պատմագրաց. Վաղարշապատ, 1893, էջ 175:

¹⁷ Թ ո ս վ մ ա Մ է ծ ո փ է ց ի. նշվ. աշխ., էջ 264:

բնութագրելով իբրև «ոչ քրիստոնյայի, կախարդի և հերձվածողի»¹⁸: Նրանք նպատակադրվել էին բեկի միջոցով տապալել կաթողիկոսին: Յադուբն սկզբում մերժեց նրանց առաջարկը՝ հավանաբար, կաշառք ակնկալելով: Հարկավ, երբ Չաքարիա Հավուցթառեցին նրան խոստացավ «անթիւ եւ անհամար արծայթ», բեկն իսկույն հրաման տվեց կաթողիկոս ձեռնադրել Արտազի Գրիգոր եպիսկոպոսին¹⁹: Վերջինս, – գրում է Մամուել Անեցու շարունակողը, – կաթողիկոսի Աթոռին «Նստաւ թուրքով և դաբալով»²⁰: Կիրակոս կաթողիկոսի գահընկեցությունը մոտավոր հաշվումներով տեղի է ունեցել 1443 թ. ապրիլի 21-ին²¹:

XV դարի վերջերին և XVI դարի սկզբին Հավուց թառի վանահայր է հիշվում Չաքարիա վարդապետը, որը ևս Պահլավունի էր: 1487 թ. նա վերստին տիրացավ Գառնիի շրջանում իր տոհմի ժառանգական կալվածքներին, այդ կողմերին իշխող Ամիրքյանալ բեկից հինգ հազար դինարով գնելով Մանկուս, Ավանիկ, Կուտիս, Հայոց թառ, Կուտուց վանք, Ավանասար, Թառնիս, Սուրբ Մարգիս գյուղերն ու Կոխդ գյուղի կեսը: Նշված իննը գյուղերի կալվածագրում Չաքարիան հանդես չի գալիս իբրև Հավուց թառի վանահայր: Չի արձանագրվում, որ այդ գյուղերը վակֆ են արվում (նվիրաբերվում են) վանքին, քանի որ, ինչպես հավաստում է Միմենոն Երևանցին, Չաքարիայի տոհմի անդամներն «ի բնէ անտի ազատագունք էին և անուանիք, շատազգ և հարուստք, յորոց թէպէտ ոմանք վանականք լինէին, ոմանք աշխարհականք, սակայն մի էին տամբք և ընչիւք, և իւրեանց էր համարեալ գեօղն և վանքն առանց խտրութեան»²²:

Այս տողերում վկայված է հայ աշխարհիկ ու եկեղեցական հողատիրության միաձուլման իրողությունը²³: Նույն Չաքարիայի խնդրանքով Սեֆյան շահ Իսմայիլ I-ի (1502–1524) կողմից Հավուց թառի վանքին տրվեց ապահարկության իրավունք, որով վանքը «ոչ խարճ դիւանի, ոչ մուլք և ո՛չ այլ ինչ հարկ տայցէ ումէք»²⁴: Մակայն հետագայում «ի նուազիլ կարողութեանց և իշխանութեանց սոցա և ի բաժանիլ ազգականացն յիրերաց, սկսաւ խտրութիւն անկանիլ ի մէջ վանականացն և աշխարհականացն վասն մրից և այլոց ընչից»: Ստեղծված պայմաններում Չաքարիա վարդապետը և իր ազգական Համազասպը Հայոց թառ, Մանկուս, Ավանիկ, Քաղերթ և Սուրբ Մարգիս գյուղերի հողաբաժինների կեսը վակֆ են տալիս Հավուց թառի Ամենափրկիչ վանքին: Չաքարիան կարողանում է շահ Իսմայիլ I-ի հաջորդ շահ Թահմասպից մոտ 1524 թ. արտոնագիր ստանալ, որով նշված գյուղերը պետք է մուլք վճարեին Չաքարիային²⁵: Այդպիսով, Հավուց թառի կալվածները ոչ թե վակֆային սեփականություն էին, այլ Չաքարիա Պահլավունու սեփական մուլքերը²⁶:

¹⁸ Նույն տեղում, էջ 262–264:

¹⁹ Նույն տեղում, էջ 265:

²⁰ Մ ա մ ու ե լ Ա ն ե ց ի, էջ 175:

²¹ Մ. Օրմանեան. Ազգապատում. Բ, Մայր Աթոռ Ս. Էջմիածին, 2001, էջ 2487:

²² Չամբո, էջ 277:

²³ Հայ ժողովրդի պատմություն (ակադեմիական ութհատորյակ). հ. IV, Երևան, 1972, էջ 66:

²⁴ Չամբո, էջ 277, Դ. Ա լ ի շ ա ն. Այրարատ. Վենետիկ, 1890, էջ 357:

²⁵ Չամբո, էջ 278:

²⁶ Մատենադարանի պարսկերեն վավերագրերը. հրովարտականք, I, կազմեց Հ. Փ ա փ ա զ յ ա ն, Երևան, 1956, էջ 96:

Ավելի ուշ, սակայն, դրությունը փոխվում է: Պահլավունի տոհմի աշխարհիկ ներկայացուցիչները հարկադրված են լինում Հայոց թառ, Կոխո, Կուսուց վանք և Թառնիս գյուղերի մուլքերը վաճառել Հավուց թառի Ամենափրկիչ վանքին²⁷:

Ձեռագիր մի հիշատակարանում հիշվում է Հակոբ վարդապետը, որը բնութագրվում է իբրև «քաջ և արի ուսուցչապետ (րաբունապետ)», «մարդասեր և առաքինի, շնորհաբաշխ» և այլ որակումներով: Հակոբը, ըստ հիշատակագրի, «է որդի հարազատի և նահատակի ի մեծ ազգէն պարթևացի»²⁸: «Ազգէն պարթևացի» արտահայտությունը թույլ է տալիս կարծելու, որ Հակոբ վարդապետը Պահլավունիների շառավիղներից էր²⁹: Նույն ձեռագիր հիշատակարանում նշված են Հակոբի մեծ պապը՝ պարոն Միրզեն, պապ Վելիճանը, հայրը՝ Շամվոն քահանան (նահատակված թուրքերի ձեռքով), մայր Ազիզը, հորեղբայրները՝ պարոնտեր Հակոբը և Մելիք Ադան, եղբայրները՝ Գրիգոր կաթողիկոսն ու Ադաճանը³⁰: Գրիգոր կաթողիկոսը, հավանաբար, նույն Գրիգոր XII Վաղարշապատեցի կաթողիկոսն է (1570–1587)³¹:

Առաքել Դավրիժեցին XVII դարի սկզբին Հավուց թառի եպիսկոպոսներ է հիշում Մանուկին և Մանուելին: Նրանք ևս պետք է Պահլավունի շառավիղներից լինեին³²: Մանուելն ապրեց այն բոլոր սարսափները, որ բաժին էր ընկել իր ժողովրդին 1603 թ. վերսկսված թուրք-պարսկական պատերազմի ընթացքում: Պատերազմի թատերաբեմը հիմնականում Այրարատն էր: Իսպանացի ուղեգիր Անտոնիո դե Գուվեան, որ ականատես էր այդ պատերազմին, Շահ-Աբբասի կյանքն ու գործունեությունը լուսաբանող իր արժեքավոր աշխատության մեջ պատկերել է 1602 թ. աշնանից մինչև 1608 թ. ընդգրկող ժամանակահատվածում տեղի ունեցած անցքերը: Շահ-Աբբասի զորքի արշավուղին, ըստ այդ հեղինակի, ձգվում էր Ջուլֆայով, որը «բազմամարդ էր և բացառապես բնակեցված հայերով», Օրդուբադով, որը նույնի վկայությամբ՝ ուներ «յոթից ութ հազար բնակիչ, մեծ մասամբ հայեր», Նախիջևան քաղաքով, «որը համարյա նույնպես ամբողջությամբ բնակեցված էր հայերով»³³: Շահ-Աբբասի զորաբանակը 1603 թ. վերջին հասնելով Երևան քաղաք՝ պաշարում է այն: Երևանը, համաձայն նույն հեղինակի վկայության, «ամբողջովին բնակեցված է հայերով, քաղաքի հողը մշակելի ու բերրի է և հարուստ ամեն տեսակի մթերքներով»: 1604 թ. Շահ-Աբբասի կողմից կազմակերպված Այրարատի բնակչության բռնազաղթի հետևանքով հայերը հայտնվեցին ահազարհուր կացության մեջ: Հայրենի եզերքները թողնելու համար նրանց տրվեց երկու օր: Հարձակման անցած թուրքական զորքերի ճանապարհին ընկած Այրարատյան երկիրն անապատի վերածելու համար այն պետք է մարդաթափ արվեր:

²⁷ Ջամբո, էջ 278:

²⁸ Ցուցակ հայերեն ձեռագրների Թիֆլիզի Ներսիսեան հոգևոր դպրանոցի, կազմեց Ստ. Կանայեանց, Թիֆլիզ, 1893, էջ 40:

²⁹ Գ. Յ ո վ ու ե փ է ա ն. Խաղբակեանք..., էջ 421:

³⁰ Ցուցակ հայերեն ձեռագրների Թիֆլիզի Ներսիսեան հոգևոր դպրանոցի, էջ 40:

³¹ Գ. Յ ո վ ու ե փ է ա ն. Խաղբակեանք..., էջ 421:

³² Նույն տեղում, էջ 421:

³³ Մ. Զ ու լ ա լ լ ա ն. Հայ ժողովրդի XIII–XVIII դարերի պատմության հարցերը ըստ եվրոպացի հեղինակների. գիրք Ա, Երևան, 1990, էջ 138–139:

Շահի հրամանի դեմ ըմբոստացողներ եղան: Նրանցից էին Հավուց թառի Մանուել եպիսկոպոսը, որը Գեղարդա վանքի եպիսկոպոս Աստվածատուրի հետ «առեալ զարս ոմանս ի մերձաւորաց իւրեանց՝ կարգաւորս և աշխարհականս», հրաժարվեցին տեղահանվել և մտնելով Գեղարդաձոր, թաքնվեցին մի քարայրում, հուսալով, որ պարսիկ զորականները չեն հասնի այդտեղ: Սակայն բռնագաղթն իրականացնող Ամիրզունա խան Ղաջարը տեղեկացավ այդ մասին և զինվորներ ուղարկեց նրանց գերելու համար: Զինվորներից մեկը մտավ քարայր և գլխատեց իր դեմ ծառացած Մանուել եպիսկոպոսին: Շահի զինվորները սրի քաշեցին նաև Գառնիի գավառի լեռնախորշերում ապաստանածներին՝ չխնայելով անգամ ծերերին ու երեխաներին³⁴:

Այնուհետև Հավուց թառի վանահայր են հիշվում Մարկոս Զուղայեցին³⁵ և ուրիշներ, որոնք, հավանաբար, այլ գերդաստաններից էին սերում:

Տակավին XIV դարում Պահլավունի տոհմի որոշ ժառանգներ, չհանդուրժելով օտար բռնատիրոջ կամայականությունները, հեռացան Ղրիմի թերակղզի, որը, ինչպես գրում է XVII դ. տաղասաց, Կաֆա (Թեոդոսիա) քաղաքում ծնված Մարտիրոս Ղրիմեցին, – «ոչ էր այն մեզ երկիր սեփական, զի մեք հայ ենք ազգաւ և ցեղ Պահլաւեան»³⁶:

Ղրիմում հաստատված Պահլավունիների մասին ուշագրավ տեղեկություններ կան Մաշտոցի անվան Մատենադարանում պահվող մի Հայսմավուրքում, որը գրել են տվել ջելալիների շահատակությունների պատճառով հին Նախիջևանից Ղրիմ փախած Աբրահամ Պահլավունու զավակներ Տրդատը և Աննան՝ 1690 թվին: Զելալիների ավագակային հարձակումները կատարյալ պատուհաս էին հայության համար: Այդ մասին խոսում վկայություններ են պահպանվել ձեռագիր հիշատակարաններում³⁷: 1299 թվականին, ինչպես հավաստում է Հայսմավուրքի հիշատակագիրը, հայերից շատերը «թողլով զոսկեգօծ պալատս և զծաղկաւէտ դաշտս, զվանորայս և զեկեղեցիս աւեր, չուեալ եկին որպէս փախստական ի յԱխսարայ, որ է ի մէջ Հաշտերիսանա և Ղազանու»³⁸: Սակայն այստեղ էլ նրանք ենթարկվում են թաթար-մոնղոլների կամայականություններին, ուստի որոշում են հեռանալ Ղրիմ, որը դեռևս 1239 թ. գրավել էր Բայթու խանը: (Ավելի ուշ՝ 1443 թվականից Ղրիմը դարձավ ինքնուրույն խանություն՝ Գիրեյների թաթարական տան գերիշխանության ներքո): Տակավին XIII - դարի երկրորդ կեսին ջենովացիները մոնղոլ-թաթարների հետ կնքված պայմանագրով տիրացան Ղրիմի հարավարևելյան ծովամերձ տարածքներին՝ կենտրոն դարձնելով Կաֆա քաղաքը: 1299 թ. Ախսարայից գաղթած հայերն այդ քաղաքում հաստատված Ջենովայի հյուպատոսի հետ պայմանագիր («ուխտ») են կնքում, և հաջորդ տարի «իշխանք և ազնիւք և հասարակ ժողովուրդք՝ վառեալ զինու պատերազմելով

³⁴ Ա ն ա ք ե լ Դ ա վ ը ի Ժ ե ց ի. Գիրք պատմութեանց, աշխ. Լ. Խանլարյանի. Երևան, 1990, էջ 83–85:

³⁵ Զաքարեայ Մարկաւագի Պատմագրութիւն. Վաղարշապատ, 1870, էջ 56:

³⁶ Ա. Մ ա ր տ ի ր ո ս յ ա ն. Մարտիրոս Ղրիմեցի. Երևան, 1958, էջ 144:

³⁷ Հայերեն ձեռագրերի ԺԷ դարի հիշատակարաններ (1601–1620 թթ.). հ. Ա, կազմեցին Վ. Հակոբյան և Ա. Գ. Հովհաննիսյան. Երևան, 1974, էջ 179, 235, 246–247, 288, 415 և այլն:

³⁸ Մաշտոցի անվան Մատենադարան, ձեռ. 7442, թ. 281:

ընդ թաթարացն ճեխքեալ գան ի Ղոթիմ և բնակին ի Ֆեօտոսիա» և այլուր³⁹: Ձենովացիները հաճությամբ ընդունեցին հայերին, իբրև քրիստոնյաների և գործարար հատկանիշներով օժտված տարրի: Նրանց բնակության համար հատկացվեց Կաֆայի շրջապարիսպներից դուրս ընկած լեռնոտ տեղանքը, որը պարսպապատեցին՝ բնակություն հաստատելով այնտեղ⁴⁰: Նրանք այդտեղ հիմնեցին եկեղեցիներ (ջենովական իշխանությունները հայերին և հույներին արգելում էին Կաֆայի միջնաբերդում եկեղեցիներ կառուցել⁴¹):

Ղրիմում հայ գաղթականությունը հաստատվում է նաև ուրիշ բնակավայրերում՝ «ի Ղարասուպագար, ի Պաղջասարայ և ի Կեօզով»⁴²: Հայահոծ բնակչություն ունեին նաև Սուդակ, Սուրխաթ, Աքմեչիթ (Միմֆերոպոլ), Բալակլավա, Օրաբագար (Արսյանսկ), Տավրիկյան Խերսոնես բնակավայրերը: Հայերը մեծամասնություն էին կազմում Կաֆայում, որտեղ ջենովացիների թիվը մեծ չէր: Հայերը Կաֆան համարում էին «հոյակապ և հռչակավոր մայրաքաղաք»⁴³, «աստվածաշեն և երկնանման մայրաքաղաք»⁴⁴: Մարտիրոս Ղրիմեցին գրում է, որ Ախսարայից Ղրիմ տեղափոխված հայերը՝

Եկեղեցովք լցին զվայրսն ամենայն
Փոխան եկեղեցեացն, որք ի Շիրական⁴⁵:

«Շիրականի» տակ, անշուշտ, մատենագիրը նկատի ունի Մեծ Հայքի Շիրակ գավառը, որտեղ իրենց եկեղեցաշինությամբ հայտնի էին Պահլավունիները: Կաֆայում կառուցվել է 24 հայկական եկեղեցի⁴⁶: Տավրիկյան Խերսոնեսում հայտնաբերված խեցեղենը նմանություն ունի Անիում արտադրվածի հետ⁴⁷: Խերսոնեսի միջնադարյան բաղնիքները նման են Պահլավունիների ոստան Ամբերդում հայտնաբերված բաղնիքներին⁴⁸:

XIII դարի վերջին հին Նախիջևանից Ոսկե հորդա է գաղթում նաև Պետրոս Պահլավունին, որդու՝ Դավթի հետ: 1330 թ. նրանք Մաղաքիա Պահլավունու հետ տեղափոխվում են Կաֆա, կառուցում նրա բերդը⁴⁹: Դավթի Պահլավունին մնում է Նախիջևանում, որտեղ նա, ըստ Հայամավուրթի հիշատակարանի, ունենում է Սեդրակ անունով որդի, իսկ վերջինից ծնվում է Մարգարը, սրանից էլ՝ Սագին: 1602 թ. Սագի Պահլավունու որդի Աբրահամը գաղթում է Ղրիմի թերակղզի: Ըստ նույն հիշատակարանի, «ի յաւերելն ջելային՝ զերկիրն Պարսից, բազումք ի յազգէ մերմէ չուեալ անտի

³⁹ Նույն տեղում:

⁴⁰ Բ. Ք ո լ շ ն եր ե ա ն. Պատմութիւն գաղթականութեան Խրիմու Հայոց. Վենետիկ, 1895, էջ 103:

⁴¹ Վ. Մ ի ք ա յ ե լ յ ա ն. Ղրիմահայոց պատմություն. Երևան, 1989, էջ 17:

⁴² Մաշտոցի անվան Մատենադարան, ձեռ. 7442, թ. 281:

⁴³ ԺՂ դարի հայերեն ձեռագրերի հիշատակարաններ, կազմեց Լ. Խաչիկյան. Երևան, 1950, էջ 548–549:

⁴⁴ Հայերեն ձեռագրերի ԺԷ դարի հիշատակարաններ, Ա, էջ 175 և այլուր:

⁴⁵ Ա. Մ ա թ տ ի թ ո ս յ ա ն. նշվ. աշխ., էջ 146:

⁴⁶ О. Х а л п а х ч ь я н. Армяно-русские культурные отношения и их отражение в архитектуре. Ереван, 1957, с. 20.

⁴⁷ А. Я к о б с о н. Средневековый Херсонес (XII–XIV вв.). М.–Л., 1950, с. 105.

⁴⁸ Նույն տեղում, էջ 81:

⁴⁹ Մաշտոցի անվան Մատենադարան, ձեռ. 7442, թ. 281:

զան ի Ղրիմ»⁵⁰: Կաֆայում, ինչպես նշվեց, դեռևս XIV դարում ապաստան էին գտել Պահլավունիները: Աբրահամ Պահլավունին և իր քեռորդի Պետրոս Բագրատունին Մուղալենց Մարգարի (որը գուցե մերձակցություն ուներ Կաֆայի Պահլավունիների հետ) հովանավորությամբ նույնպես հաստատվում են Կաֆայում: Մարգարը ջենովական հյուպատոսի կողմից օժտված էր լայն իրավագործությամբ: Նա իր տնօրինության տակ ուներ նաև գորաբաժին, որը Կաֆան պաշտպանում էր թաթարների հարձակումներից: Մուղալենց Մարգարը սիրահոժար ընդունեց Աբրահամ Պահլավունուն և նրա քեռորդուն, անշուշտ, նկատի առնելով նաև նրանց ծագումը: Նա, ինչպես հավաստում է հիշատակարանագիրը,– «ի տեսանելն Աբրահամին Պահլաունենց և Պետրոսին Բագրատունենց, պարզեաց նոցա զբազում ինչս և զստացուածս և պալատ մի ի բնակութիւն ի պատիւ տոհմի նոցին»: Սակայն Պետրոս Բագրատունին «յետ ոչ բազում ժամանակաց առ Աստուած փոխեցաւ ՌԿԷ (1618) թուին»⁵¹: 1620-ական թվականներին Աբրահամ Պահլավունին կնության է առնում «գղուստրն ազնիւ Գէորքին Մուղալենց» և հարստանում նրանց օժանդակությամբ⁵²:

Կաֆա քաղաքում (որտեղ հաստատվել էր Աբրահամ Պահլավունին) լայն չափերով դրսևորվեց «անեցի դրիմաբնակ հայ ժողովրդոց ժամասիրութեան և եկեղեցաշինութան եռանդը»⁵³, որին անմասն չէին Պահլավունիները: Աբրահամ Պահլավունու որդի Տրդատն իր քրոջ՝ Աննայի հետ Կաֆայում կառուցել է տալիս Ս. Նիկողայոս եկեղեցին, որը դարձավ նրանց տոհմական հիշատակների պահպանան ու սրբազնագործողը: Այդ ժամանակամիջոցում Կաֆայում դեռ պահպանվում էր Հռոմի կաթոլիկ եկեղեցու ազդեցությունը: (Տակավին XIII դարից քաղաքի հայերն ունեին հայ-կաթոլիկ թեմակալ եպիսկոպոսներ⁵⁴): 1475 թվականից ի վեր, երբ Ղրիմին տիրացան օսմանյան թուրքերը, հայերի վիճակը ծանրացավ, և ավելի մեծացավ ուժացման, ազգային-կրոնական դիմահեղման վտանգը: Սպառնալի չափեր էին ընդունել թուրք-թաթարական ցեղերի շահատակությունները: Մարտիրոս Ղրիմեցին՝ ժամանակակից տաղերգակը գրում է.

Յետ այսմ ամենայնի այնք որ ի Կաֆայն,
Խոշտանգեալ տաքնապին յազգէն հոնական,
Զի գայր պատերազմաւ դժնատես ազգն այն
Առնէր վնաս բազում ընչից և մարդկան...⁵⁵

⁵⁰ Նույն տեղում: Ղրիմում հայերի հիմնած գյուղերից մեկը կրում էր Նախիջևան անունը, որը վկայված է գյուղի տարածքում եղած մահարձանի վրայի արաբերեն արձանագրությամբ (տե՛ս Մ. Բ Ժ 2 կ և ա ն ց. Ճանապարհորդություն ի Լեհաստան և յայլ կողմանս բնակեալս ի հայկազանց սերելոյ ի նախնեանց Անի քաղաքին. Վենետիկ, 1830, էջ 329): Գյուղը կարող էին հիմնել հին Նախիջևանից գաղթածները, որոնց մեջ գուցե եղել են նաև Պահլավունիներ:

⁵¹ Մաշտոցի անվան Մատենադարան, ձեռ. 7442, թ. 281:

⁵² Նույն տեղում, թ. 282–283: Կնոջ անունը Թագուհի էր (նույն տեղում, թ. 283):

⁵³ Ք. Ք ու շ ն եր և ա ն. նշվ. աշխ., էջ 83:

⁵⁴ Հայ-իտալական առնչություններ, ջենովական փաստաթղթերը դրիմահայերի մասին, աշխ. Վ. Միքայելյանի. Երևան, 1974, էջ 31, 35:

⁵⁵ Ա. Մ ա ը ի ը ո ս յ ա ն. նշվ. աշխ., էջ 146:

XVII դարում թաթարները բազմաթիվ հայերի գերում և վաճառում էին Ղրիմի շուկաներում: Նույն ժամանակաշրջանում թերակղզում լայն քարոզչություն էին ծավալում Դոմինիկյան միաբանության կաթոլիկ միսիոներները, որոնց 1625 թ. Ղրիմի խանն արտոնեց ազատ կերպով գործունեություն ծավալել Ղրիմում, հատկապես Կաֆայում⁵⁶:

Ստեղծված պայմաններում Կաֆայում հաստատված Պահլավունիները առանձնահատուկ հոգածություն են դրսևորում իրենց տոհմի հարատևման, նրա ավանդների պահպանման ուղղությամբ: Ուշագրավ է, որ վերը հիշված Տրդատ և Աննա Պահլավունիներն իրենց հիմնած եկեղեցում պահվող Հայսմավուրքում արձանագրում և իրենց տոհմի շատավիդներին պարտավորեցնում են «յետ մահուան իւրաքանչիւրոց հարց աճեցուցանել զարական ճիւղս իւրեանց ի վերայ ծառոցն, առ ի յիշատակ տոհմին իւրեանց» և յուրաքանչյուր տարի նույն եկեղեցում կազմակերպել տոնախմբություն՝ տոհմի նահատակների հիշատակը ոգեկոչելու համար⁵⁷:

ОЧЕРКИ ИСТОРИИ РОДА ПАХЛАВУНИ В XIII–XVII ВВ.

ВРЕЖ ВАРДАНИЯ

Р е з ю м е

После падения Багратидского Армянского царства княжеский род Пахлавуні в основном функционировал в провинции Ширак, в частности, в столице средневековой Армении–Ани. Представители рода Пахлавуні всячески содействовали жизнеспособности армянского общества и государственности. В XII–XIV вв. они твердо придерживались курса Захаридов, играя видную роль в государственной иерархии северо-восточной Армении. Пахлавуні ярко отличились на военно-политическом, религиозном и культурном поприще. Вплоть до XVII в. отпрыски Пахлавуні сохраняли феодальный сюзеренитет над имениями монастыря Хавуц тар. Архиепископ Захария Пахлавуні в 1441 г. содействовал перемещению престола католикоса всех армян в Эчмиадзин. Из-за тяжелых гонений со стороны иноземных завоевателей потомки Пахлавуні в XIV, затем в XVII вв. были вынуждены переселиться на Крымский полуостров.

⁵⁶ Վ. Մ ի ք ա յ է լ յ ա ն. Ղրիմահայ գաղութը Արևելք-Արևմուտք հարաբերությունների ոլորտում (13–18-րդ դարեր). Երևան, 2000, էջ 186–187:

⁵⁷ Մաշտոցի անվան Մատենադարան, ձեռ. 7442, թ. 283: